

安雅堂未刻稿

安雅堂未刻稿卷第六

萊陽 宋 琬 玉叔 著

序

司徒王公凱旋序

嘗讀詩至嵩高之篇慨然於仲山甫之爲將也而詩人之美吉甫曰文武吉甫萬邦爲憲自茲以降由漢迄明一代之興必有倣儻非常之佐勳夾輔以固我不不基然而歷將相之位能以功名垂不朽者亦代不數人焉蓋爲政而識大體履盛滿而無驕矜之色所以難也國家肇基東土一時豐沛從龍之彥率皆鷹揚豹蔚負

間世特鍾之才而不茹不吐有古大臣風者則我王公
其人也蓋公以股肱重臣來筦度支不佞得在下風贊
末議見其剗紛理劇當機立斷而大要以寬恤民力爲
急務如減天下田租之半罷關梁鹽酤一切無藝征其
策皆自公發之至於從容宴笑揮卮浮白英英豪邁真
氣達戶牖間諸郎吏愛公如慈母然人人奉教令惟謹
卽罔敢不交相勉者書曰克勤小物正色率下惟公有
焉歲戊子

天子思念舊勳以公爲固山額真兼右侍郎如故會山
以左曹濮盜起羽檄日再三至

上顧廷臣中惟公爲可使有 詔統勁旅往平之至則
下令軍中曰吾奉

天子命爲百姓除害其有願歸農伍者皆勿誅於是脅
從之衆詣軍門降者數萬人遂執其渠首獻京師 朝
廷嘉公之功慰勞賜予無虛日公獨歛然謝曰以 陛
下之靈赤子不盜弄於潢池小臣何功之有然齊魯之
創則亦已深矣臣幸得待罪行閒馳驅二千里人烟斷
絕卽戎馬終日行蓬蒿中夫二東者天下之襟喉也及
今復其田亟選廉有司往還定勞徠猶懼弗輯不然雖
勞師無以善其後予聞公言則退而告之同官諸公曰

吾曩者知公爲豪舉乃今洵長者也夫開國之臣不患無功而其病常在於喜事蓋憑國家新造之威壓蘖芽烏合之衆卽何難殄滅之無遺育以爲已功乃公則意在止戈慨然爲根本慮深遠且復條民所疾苦以請命於朝雍容西第口不言齊魯之功此其風期器識有非王龍驤杜元凱所可及者然則錫歌鐘勒昆鼎不足以爲公榮頒彤璽銘帶礪不足以爲公頌亦惟是爲二東父老再拜致祝曰願國家早建藩輔如成周分陝故事賜我公弓矢鬯卣庶幾穆陵無棣世世受公之賜又無已則爲薄海之內再拜致祝曰願公如劉晏韓滉以

宰相兼領度支斟酌變理登民大酺以佐

聖天子億萬年之休惟我公亦有無窮之聞余不佞旣以鞭弭之役習公最深又家本齊也被公之澤爲獨早而樂爲桑梓頌其私故於公之出也嘗采芑以送之今其飲至還也歌彤弓之三章焉諸郎吏咸在執事其洗觴更酌爲天下賀

單漢平稿序

吾東萊之有諸單猶江左之有顧陸潁上之有荀陳也其文章累葉衣被海內歷金閨翔王路者不可勝紀而拙菴香令以新朝簡廸方軌連鑣聲籍甚長安公卿間

子蓋從褐衣卽與之遊見其閨闈雍肅淵清玉潤殆不
勝元方兄弟之慕焉今年夏得交其伯氏漢平於吳門
因與之泛扁舟登虎阜弔闔閭之故墟上要離之荒塚
極目平原傷心千里曰嗟乎湛盧西子埋魂茲土數千
百年呼之如或可出然使歐冶之術未工館娃之宮不
築則純鉤殆與頑鐵同銷而夷光者亦苧蘿西村一田
姬耳又安能聲施後世爲懷古者所豔稱哉酒酣以往
撫劍哀歌袒褐狂呼酌山靈而觴明月觀者咸驚怪不
知余輩爲何許人也居無何乃別去旁一奚奴負紵囊
立單子取以授予曰數十年目光心血悉具此編子其

爲我論之予讀未及終作而歎曰有才如此而尚滯葢
葢造物者若或忌之然忌之則又何爲亶厥異資使之
探委婉之藏而發龍威之秘哉且匪獨單子然也葢予
亦負蛾睂而晚嫁者其始也恢奇縱恣放神入極譬若
奔駒不可羈勒納於康莊決銜毀埒葢如是者有年旣
也規摹往古好爲鉤深匪盤盂不貴匪岫嶠不隳鐵肝
鉢胃以奧以幽方諸黝室風雨窈冥如是者又有年終
也漸喜鉛華馳以浮豔晉魏之格稍沿齊梁之體間作
析楊皇數里耳所欣如是者又有年而後乃今侂得之
也方其俛仰一室抽毫自娛不有古人安知來者究乃

戚戚之懷間以喁喁之口顧影寡妍撫心滋厭於是抑已就人終慚學步違新守故不免膠絃悠悠天地之大曾不得一人爲論定而徒以供不知已者之詬厲此虞仲翔有青蠅之歎而樓下之躋人所欲得笑臣者頭也丁儀有言文之好醜我自知之後世誰相知定予文者由是言之懷璧者求其玉不必邀卞和之知也操琴者賞其音不必期成連之聽也昔者才如公幹猶有齊風燕公偉麗宏深論者以爲得江山之助今單子旣已策孤筇俯絕巘覽長江之浩瀚望君山之巖崑其自是而陟金焦臨北固過蕪城撫鮑昭陳琳之遺跡興懷覽勝

所得多經奇之旨吾知驚人新語多在不注峰頭而汎
嵒湖之波無異觀廣陵八月濤也齊魯信多才則未有
若髯之軼倫絕羣者單子其行矣乎

程少月詩序

文章之道譬之於射懸鵠百步拓弓注矢非其人專精
而篤好之則莫能以倕中然而有善有不善焉善射者
心閒手敏不規規於萬武卽未必發卽破的而意氣沛
然若有餘不善射者雖授之繁弱之弩烏獲后羿從而
訓之其發也非偏則離爲笑而已矣然又非獨射也推
之百工技藝莫不皆然新安程子少月落落有奇致遇

異人授以千支家言閉門覃思期月而畢通其術遠近之稽疑者無識不識咸造其廬爭得一言爲著蔡余嘗就而質之所言多奇中一日出其所爲詩一編予覽之如倉鷄之初出於谷雖未必盡喈喈之音而要令聽者不厭因歎其在塵壒之際不欲以方伎自見而鰓鰓焉以斬一言之或傳爲足感也吾友桐城方爾止最喜爲人改詩時人謂其有修詩癖程生每有所吟輒往咨焉於是愈喜益自負日夜苦吟不少衰花晨風夕山巔江渚興之所臻不下簾而往從之者如追逋療疾遂其至而跡之乃程生則方聳肩高詠睨之曰今者不暇子姑

去余嘗謂晉人軼事於世務多所遺棄後人遂傳頌之
以爲高使程生生於其際則此事已確然足傳況其詩
有進焉者乎語曰行百里者半於九十蓋言末路之難
今程生旣已捐形祛累幾棄其所學以從吾遊矣則當
取古人之詩一如所爲治千支家言者鑱心鉢目研極
於風雅之變別其體製究其指歸孰簡而該孰麗而則
孰婉而多風孰華而不靡孰閎深而灝瀚孰要渺而超
忽泳之游之飲食而寤寐之不越期年必大有異余與
方子將卹然駭也而又何筆削之敢議程生厚自勗請
以余之論射爲羽括之助可乎是爲序

朱月槎詩序

代先大夫作

昔王右丞以詩畫擅名盛唐論者比於水乳之合以今所傳輞川諸作及所自爲圖觀之雖丹青磨滅去幾千年而高山灌木幽篁流水若將見其角巾藜杖徘徊於槐陌鹿柴之間彈琴而長嘯也然曹霸韓幹張僧繇之徒其文詞不少概見何哉中吳之士其於詩畫蓋天性也童子櫛比宮商略上口塗山水得其影似輒懷刺走四方以納交於士大夫之前故人之去其鄉者衆而世之遇之者亦頗輕夫余之所遇固多矣然于吳得二君子焉則彭君興祖與月槎也余自去頓邱後佐劇銓司

兩人遂謝去不一見比歸川則興祖已命車海上又期
年而月槎始以雞絮唁余于戚嗚呼之二子者其際翟
公之客爲何等也月槎之游多在濟上觀其所咏古南
池數詩悠然有凌太白之意卽余鄉與偕時猶且揮卮
豪放氣岸照人每有吟無不立就者今別去幾年而面
色黯然若有深憂余蓋乍見而怖之也月槎飲數巡顧
余泣曰某不幸困於蒺藜吾入吾之宮而不見吾妻也
未幾時興祖之從子亦至亟發書誦之道其老且喪子
家用銷亡而字畫多錯訛不似興祖之握管者問其目
則曰盲矣嗟乎以余一人之身未及數年之間而親見

其盛衰若此此足以見二子之遇之窮而且知余之殆將老也人生過隙駒耳宜乎月槎之詩自命爲風萍也月槎遭益窮然其詩且益工自登泰山以來復多悲壯慷慨之音予有別墅曰旌旗山月槎圖之十日而畢繪事忽念其老母請行少子琬固畱索題予止之曰稚子勿庸也夫月槎雖行然其詩已在圖中矣

沈惠孺詩序

山水朋友天下之真樂也而恒苦於不相遇意之所期有終身而弗踐其地且曠世而罕覩其人者矣若夫身歷名區獲與英人達士爲友而鬱鬱焉無登臨執手之

歡君子蓋不勝惜焉而余以謂猶愈於聞聲相思與夫
寫名山於牆壁而自謂臥游者也姑孰山水之美最於
東南如所稱天門白紵凌歊采石諸勝概加以謝宣城
李供奉翱翔觴咏而名益彰竊臆其人已往而屐痕杖
迹或隱見於烟波上下之間以爲何時得至其地與二
三同志之彥倡汝和予俯飛濤而凌絕巘庶幾乎興懷
弔古酬所願焉去年秋余以奉權來鳩茲暮夜月明峰
巒滅沒僕夫指以示余曰此青山道上也受事以來日
鞅掌於算緡之役簿書唯諾而外卽不得縱步履尺故
登覽之事絕少而縞帶酬倡之交亦十不一二焉東陽

沈君惠孺自恒陽來貳此邦余得與訂歲寒之盟見其
鬚眉英朗雖越產而有燕趙慷慨之氣因笑謂之曰沈
休文聰明敏妙而腰甚細子豈其後身耶已而讀其詩
泚泚乎淵深而幽渺爲不愧乎風人之旨自太行滹沱
芒碭淮泗經行之處靡不見之於篇什而武林草猶多
憂深思遠瞻雲望岷之言試與之登巉巖觀澎湃踐元
暉之遺宅臨太真之清浦倡汝和予當有可觀而惜乎
其有羈羈繫維之阻僕僕無暇以爲而余亦將去而告
代矣則豈非山水朋友之緣猶未能暢然於所遇抑誠
有數焉爲之制歟雖然余雖以拘牽之故謝不敏於江

山而沈子方且奮其才思孤筇短棹縱意所如探奇選勝必多淒清激宕之音予將受而和之以代簷笠之游而補生平之缺李謝有知庶不至寂寂笑人乎則請以是編也告山靈而語鷗鷺爲兩人倡和之始可也

胡怡齋詩序

余以順治甲午備兵隴右維時平西親王駐軍漢中典書記則有冷公心芬寄心膺則有郭公巖禮楊公秀涵三君子者皆彬彬質有其文武軍中無事各以詩文自豪余亦遙相酬和郵筒往來無虛日是年秋王之貴壻怡齋胡公高列陝西鄉薦其年方舞象勺著作已膾炙

入口余雖未得把臂心嚮慕焉因而歎幕府之多賢也
今歲辛亥始見怡齋於京邸握手論交如舊相識怡齋
地望尊優冲然有以自下至其發爲篇什靡不中規應
矩上掩三唐晉郤縠之說禮敦詩王武子之英姿俊爽
斯可謂兼之矣居亡何怡齋將歸滇南以其詩屬余爲
之序余逡巡謝不敏弗獲請作而曰嗟乎貴不期驕而
驕自至人之情也況乎爵亞通侯榮尚翁主人生遭遇
至此而極矣乃聲色貨利珠玉狗馬之好無一足繫其
心者而獨操三寸柔翰與騷人墨客角勝於單詞隻句
之間怡齋則誠文士也雖然徒文士也歟哉滇以南地

居荒服猶有尉陀呂嘉之遺風

皇朝受命阻我聲教者數年賴王親統六師百戰而舉之然後天下車書歸於一統而怡齋以羈貫之年從王於帷幄之內櫛風沐雨之勞束馬懸車之險旣已飽經閱歷而茲且鼓弓臥甲馳騁於翰墨之場蓋欲使雕題鑿齒之邦一變而爲聲名文物之域遠夷暴德之歌白狼素雉之貢將有聞風而恐後者是乃所以報

天子而受成於王之上願也豈徒與騷人墨客角區區一藝之勝而已乎怡齋輾然而笑以余爲知言因而序之並以祖其行云

張螺浮奏疏序

代馮中堂作

諫官之職有二曰勿徇名勿避咎諫官而徇名則恢張
任誕有囂然喜事之心而國是搖矣諫官而避咎則瞻
顧卻步天下事或知之而不敢言或言之而無所裨益
去此二者而後得失榮瘁利害禍福舉不足以阻吾邁
往之氣夫惟不言一言而朝廷賴焉嗚乎其難哉張
君螺浮不徇名不避咎者也嘗以直節敢言受知

世祖皇帝想聞其丰裁康熙丙午以

天子春秋鼎盛疏請親政不報未幾出爲湖廣副使單
車出國門無慘淒之色踰年丁未

上始躬御萬幾起御史季君滄葦於田間旣入見卽上
言曰臣竊見刑科給事中張某立朝侃侃有古諍臣之
風

陛下誠欲興太平之業不宜使其久居外藩於是下

詔徵君復入爲給事中君感激異數至於流涕然而敢
言之氣不少挫議論剴切皆鑿鑿可見之施行者昔宋
唐介以言事外斥士大夫賦詩送之天下至稱爲唐子
方而不敢名及其被召還也仁宗嘉之稱其能不易所
守君臣遇合之間何其盛也張君之聲名風概與介等
也進退出處之遭亦復畧同而

主上之虛懷善任求讜言如不及其超越前代也遠矣
成王之告君陳曰爾有嘉謨嘉猷則入告爾后於內吉
甫之贈仲山甫曰夙夜匪懈以事一人蓋古天子之責
報於臣與夫同列之相爲勸勉也有如此余與張君幸
處昌言不諱之朝得

聖主而事之顧余非材濫竽處匪其據而張君出擁輪
軒入居省闈生民治忽之原陰陽消長之故較然若數
一二宜其言之多中乎而余獨拳拳於張君者知余之
愚且慙而箴其缺失庶得免於覆餗之虞蓋不能無厚
望焉是爲序

韋惕菴詞序

屈大夫要渺好脩自以爲紉蘭佩蕙餐英飲露而離騷
九歌雜以揭車杜若芙蓉薜荔衣裳牆屋所見無非是
者嘗怪楚之山川匪徒生人奇異也其草木亦固殊焉
惕菴生於其鄉所謂衆香國中來者茲編曾不數闕而
芳菲之氣香人齒頰殆將以娓娓兒女之情寫落落英
雄之態者歟秦淮水滿烟月最宜吾欲倩二八女郎攜
紅牙鏤管於桃葉渡頭歌之勿令曉風楊柳柳屯田獨
有千古也

王敬哉詩序

吾友王敬哉北地之偉人也海內之士無識不識咸樂與之游然又最能詩世所傳勝引樓集乃其最初刻余時方少讀之刺刺不甚可解然心知其爲純古淡泊雍容懿雅之音心壯氣得之所爲也猶憶上元之夕余與米子吉土崔子青蚓從燈市醉歸天大雪夜少人因下馬狂呼蹈藉雪中明旦視之衣履盡污敬哉獨約手忍寒清吟微笑而已當是時京師方晏如敬哉居大市西脩廊折徑幽篁怪石左列尊彝右陳圖史庭館肅清閨幃靜好雖車馬闐咽而咏歌不輟故其爲詩也幽而不纖麗而不淫迨存年草成而悼亡歎逝傷貧嗟遇之吟

作矣嗟乎士生百年之內其所爲成大名顯當世者歲月政無幾耳是故上之則遭遇隆盛副明天子任使珥筆承華直廬禁籙侍栢梁之雅讌追飛蓋於西園詩歌存諸郊廟製作譜於笙鏞昔賢所歎良爲盛軌其次則握節邊陲懸旌隴戍騶都護之車贊嫖姚之幕水弱山高日荒烟紫磨墨盾梁吮毫馬首覽沙磧之悠緬紀川原之要害意氣之盛可謂壯哉其或身將隱矣遯跡臯壤鹿門則妻子同車林慮則麇麋爲侶裹糧五嶽向平之婚嫁已終抱影空廬宗炳之山川繞壁以至懸敝席以爲門藉短轅以爲牖棲半畝之宮卻諸侯之聘秋拾

橡栗冬覆鳥毛彼其孤踽之性堅於一往歌誦之聲若
出金石古之幽人畸士類有然者顧余與敬哉所遭之
時則何如哉或逢年而無貴仕或窮歲而歎斯饑雖數
年之間顯晦或有不同然而傷心之賦痛切樽罍門內
之戚歎興帷帟悲愁於邑且有三百篇所未能盡道者
又況乎去椒舉之邦而銜庾信之哀乎雖然羈旅之傷
達人不免伯叔蒙戎旄邱攸歎越禽代馬霑屬國之襟
零雨晨風掩子荆之袂以至北征有賦思歸著吟莫不
撫節物而愴懷望關山而茹涕迄今風烟磨滅數千百
年矣曩之鏘鏘奕奕擁鐵騎鳴玉珂者不知銷沉何地

而獨此旅人游子窮愁孤憤之音得與子規蟋蟀同鳴
天地之鬱讀之者感歎流連而不能已焉繇是言之羈
旅者小人之憂君子之賜也敬哉聞余言而善之於是
愈益編摩披吟不少間其所爲詩亦益以工余嘗謂之
曰居喪亂之際有初盛之風宇內之平兆於子矣湖干
多暇聊爲論著如此世有桓譚覽其終始之際其殆琴
歌之有激楚風詩之有變雅乎

大塗姪漆湄草序

余兄宗玉文章典奧海內多誦法之居平教子弟讀書
曰取材務博養氣欲厚一藝之成必鍼目鉢心究極於

精微然後已有子大塗最愛與余同研席者有年每當
解經疏義霍然如抉蒙披翳傾聽至夜分不倦閒一談
及詩謠樂府則以爲肄業所不及或頭觸屏風睡矣喪
亂以來中更多故余雖謬爾通籍而憂戚顛蹶悲窮窘
厄備諸人所難堪之遭然無聊不平之氣亦賴有詩篇
以發之大塗視余厄等也顧其困諸生廼最久年將強
仕始貢於禮部今年春過盧龍余治悠然堂以止之燈
火嫋嫋愴愴疇昔受講時也大塗爲詩工而敏然不肯
竟學酒酣以往仰天而呼曰嗟乎士不成進士雖著書
何益也余曰審如子言則孟浩然賈島諸人詩皆不傳

矣且以汝之才守汝先子之說而勉之以幾於道夫何
艱於一第於是更倡迭和得詩若干首余笑曰老夫學
詩二十年子廼駸駸欲出其上回首觸屏風睡時不大
有異耶亟授之梓俾人知吾大塗之才其不專一藝如
此

姪孫敬躬制藝序

歲癸巳予自里門赴天水任同姓祖餞西郊一時父老
子弟畢集或舉觴致禱或折柳賦詩族之人士彬彬乎
盛已中有一總角姪孫隅坐隨行神明奕奕詢其名曰
步邴幼未命字旣而進之席前命之坐問其所讀書則

四子五經已成誦出口如傾三峽予聞而驚且喜曰具此慧性他日亢吾宗者舍是子其誰與歸由是別去而孤竹而西湖睽違鄉國初不暇問家事斯卽步祁覲面恐亦莫識其人矣今秋有家人來湖上持試帖一函窗課百篇付予覽且曰是卽癸巳歲西郊祖餞經書成誦之童子名步祁者也今其字曰敬躬客歲年十五已采頰宮芹旋復試優食餼試帖窗課具在欲丐序以重焉弟子幼攻帖括亦嘗鑢肝鉢胃研極其理趣參究其指歸稍長棄家走江淮歷吳會當時文壇老將如蒙叟梅村閒執鞭弭以從筮仕後遂覺簿書叢集文藝久疎欲

如年少時拈題構義坐小窗前搖首低眉作洛下生詠
者不可復得則信乎風塵碌碌予亦將老也而敬躬甫
弱齡作爲制藝詞氣英雋又皆學有本原異日所造胡
可限量此古人所以有年不可及之歎也因謂風積不
厚則無以負大翼水積不厚則無以載大舟假敬躬由
此績學會儒先之實理萃經籍之英華閎中肆外益發
爲清廟明堂之音其於掇青拾紫也夫何有哉予雖老
猶將握三寸不韋弁其房稿以問世是文字誠邦國之
光不第宗族之榮已也吾願敬躬厚以自勗鑒風水之
負載毋自足於小成則幾矣是爲序

武舉會試錄後序

天旣命我

皇上宅茲中土奄甸庠萬姓越荒徼內外罔有不賓賁琛玉而棧航至者絡繹踵附旣三年

天子登講武之臺慨然思大風猛士爰徵十五國赴桓之彥俾獻厥技於司馬門比臣肇國暨臣克鞏銜命往則已幾乎矍圃之射士之畱者十二三矣旣戒旣禱期得當以上慰拊髀之思迨撤闈講士相見之禮而躍然喜也夫其左櫜右韃凌轢飛揚一何壯士及夫數衿攄辭雍容博辯又何多韞韋跼跼君子也臣聞弓人之

選材也冬析幹而春液角夏治筋秋合三材寒奠體冰
析漚春被弦射遠用執射深用直往來之體均則弓斯
良矣相馬亦然直者中繩曲者中鈎方者中矩圓者中
規是國馬也而未若天下馬也天下馬有成材若卹若
失若喪其一若是者超軼絕塵不知其所是故援枹鼓
立軍門白旆如荼旌旂若電馳絕域凌奇嶮信威萬里
之外行列之盛也仰覩象緯旁畫山川本之以金版六
弢申之以縱橫押闔恢詭之觀也左繁弱之雕弓右忘
歸之勁矢飛鞚平原射麋摧虎俯馬蹏而仰月支則可
謂壯矣陷堅冒敵冰湯衽鏖乘鰲弧之旗奮羽而先登

義無返顧者則可謂勇且毅矣然執是數者以求將則百不獲一焉所謂將者曠然如夏肅然如秋嶷然如山嶽懸權而動順時而趨故不幽神鬼不險陰陽威加而六服清令出而四海肅古聖王爲之推轂尚食親告廟以策之用能勒鐘鼎分形鹽聲施奕葉而樹立宏達也故曰倣儻非常之士惟上之所御之上求材臣乾谷上推心臣捐脰矣漢高尚大度故多運籌決策之人孝武急英風故立奇功於異國者往往而不絕末世長子任輕兎宜無咏責梁麗使室鼠壞于將以補履雖有張韓耿賈之儔僅目之爲奇材劍客然一旦有急又未嘗不

建鼓求之跂彼熊羆乃得鼯鼠捷給者釋弓而嘻雄駿者荷戟而歎報生報賜卒鮮其人非材則異勢使然耳我

皇上祥鍾下武加意師貞允文允武方懋厥勳庶乎分桐歸馬虎賁脫劍之日矣然而方歌萃鹿旋賦彤弓汲汲若將不及者誠以玉步聿新如蒙斯發鼓動援起欲得英華果銳之人而用之爾多士旣躬際昌期賁賁然來矣遠惟伏波馬革之言近惕鄂國惜死之誠守之以禮達之以義將之以敬濟之以貞勿務名高而忘國家之急勿尚矜伐而開伎讎之風勿弗恤爪牙而來祈父

之譏勿甘處脂韋而貽首鼠之誚剛戾足以償事則趙括之用壯可戒也溫恕可以懷疆則祭遵之雍爛足師也且爾亦觀於國門之間非望諸君所常馮軾而遊者乎并心壹志以力追曩人異日者

聖天子裂土地而封諸侯王俾本支帶礪而外復有異姓臣若而人奔奏禦侮以仰副鏗鏘磬辨之聲豈復有幕府上首功爲文吏所摧抑者哉雲起龍驤政多士振袂之秋也詩曰周王于邁六師及之又曰矯矯虎臣在泮獻馘臣愚不敏敢珥筆而歌其盛焉

壽序

張勵齋先生八十壽序

嘗讀史至萬石君傳其父子并列朝廷而孝謹之風不以耄老少衰未嘗不慨然想慕其爲人蓋自漢元朔迄於今數千百年矣猶若見其深衣練冠一龐眉長者坐堂皇上而羣子弟偃僂屏息操几杖踞而前趨彼數馬之對抑何恭也惜乎當時無善畫者爲圖繪其事以傳於後如東門之繪二疏者而怪近世可稱道者甚少以爲風教之移人固然然以封太史勵齋先生觀之則古今人未始不相及也先生幼秉異姿長而讀書服古自邱墳典誥以及申韓莊老之術靡不究極指歸里中人

固以祭酒推之而會其尊大人解渤海司訓歸先生筮
卦得遯之上九遂不復以儒術干有司築室漆園穀城
之側取皇甫士安所著高士傳朝夕諷覽曰吾上友莊
周而近懷太白圯上老人時往來吾寤夢間吾豈復希
富貴哉甫疆仕舉丈夫子五人先生俾其長力田而餘
諸子各授一經黜華崇本敦勉勤至以故太史百嶼哀
然高第珥筆承華之署爲

聖天子廣論備顧問先生雖優游里社中然恒書崔瑗
座右銘及馬文淵誡子語以貽之曰勿行所悔勿安所
殆小子志之卽百嶼君歲時遣使相絡繹欲先生就養

於燕先生笑謂家人曰吾老幸猶健飯處先人不腆之
廬大男藝黍稷不至逋縣官租稅小者皆得畢婚娶爲
諸生吾有柴車以代步雞豚以佐饘粥射獵弋釣乎孟
諸之埜暇則負暄擁褐觀諸孫竹馬喧闐陌巷徜徉自
適足以反齒若第善事人主吾不以木天餘饌易吾祖
徠萬頃雲也性好儉凡百嶼所上服飾玩好純縑異味
之屬必藏封之不以御今年某月壽八袞矣顧獨益疆
健目光炎炎不杖鳩而行每出則乘一羸馬兩奚童髻
而相隨田父野老隻雞斗酒相邀畱輒與話桑麻較晴
雨至竟日忘勸人亦若不知其爲貴顯者云百嶼之門

人給諫林君輩嘗爲余歎美其事而并借一言爲先生
壽余曰柱下史著說五千其要不越於守雌善下故世
之爲養生家言者必宗之今先生旣已受莊生師黃石
而褫躬裕後復不肯乎聖賢謙受之指是殆將與天爲
徒餐烟霞凌日月而萬石之人爵未足以爲頌也夫抗
情物表者靡不脫屣紛華而輕遺世累假使鹿門蒙山
有子登庸於朝廟當知其不以易長往之轍然角里東
園伏生之徒又未始不以潛德經術裨益人家國今
天子方將封川禪嶽修復古明堂辟雍之儀當必博徵
耆舊如漢桓榮其人者使爲更老以光上庠祖醕之典

有司之蒲輪且將首及於先生徂徠白雲恐未可堅臥
而不出乎斯日也余請從公卿後賡黃耆貽背之章焉

辛石菴八十壽序

今夫人之有得於天也富貴榮昌令名壽考四者而已
然名位或可以力邀而壽考不可以倖致惟古之孝於
其親者則往往至於耄耄之久楚老萊漢之萬石君奮
晉王休徵其最著已書曰至誠感神詩曰孝子不匱永
錫爾類考之傳記莫不皆然周公敘述三宗歷年之永
在先知稼穡之艱難而因及於小人之乃逸乃諺以是
知儉樸者綏履之原而逸豫非所以載福存乎人之自

致而已吾邑辛石菴先生幼而事親有孝名其居喪也
杖而後能起余雖未得拜見顏色然竊聞其行多長者
不侵然諾爲任俠自其年未艾時里中人固以祭酒推
之矣嘗道遇術者占之曰不及三十其有菑乎已而病
幾殆夢神人綠袍蒼玉冕而前旒交戟殿陛如王者手
二牘笥皆有副以授公曰上帝以君純孝故爲君特增
數紀因命旌幢羽葆導之以歸而疾遂瘳嗚呼董永庾
袞之事世或以其說荒忽爲不信今先生乃竟康疆逢
吉無遘罹虐疾以至於今蓋行年八十而有嬰孺之色
焉然則爲善者其亦可以自信而不爲者亦當知所以

勉矣先生之孫茂才黃崖工爲詩善鼓琴以是月庚寅爲先生攬揆之辰將謀所以侑一觴於邾下者而徵言於余曰予小子生不能逮吾父也猶幸而事吾大父朝而出惟稼穡之言是依夕而入惟詩書之業是考自成童以來未嘗見其不宵眠而午夜起也宗祊之祀歲時伏臘之獻未嘗見其不濟濟夔夔有悽愴孺慕之狀也嫺姪宗族婚喪必赴有急難未嘗見其不撓冠奮臂噉噉德色於鄉鄰也田畝作勞烹羔酌醴咏蟋蟀之詩賡山樞之什吾大父意甚陶然而余不能不重思吾父也使吾父而在則必將致巴蜀之蒟醬洞庭之橙橘江南

之魚膾塞上之駝羹以實吾俎則必將求筇竹於閬中
觀笏簞於蘄黃與夫越女之純綿西都之麗錦以充吾
御而今竟已矣余小子嘯喈一編亦惟是得仁者之言
而禱頌之先生其勿讓焉余聞之瞿然再拜而起曰孝
哉辛生能思以言榮其祖父而所患者乃在於區區口
體之奉乎且由吾子之言思之則子之大父類聞道者
彼方以仁義爲糟粕以萬物爲糠粃視喜怒愛憎舉無
足以累其心者而又何榮膺之是美爲嗟乎鄉里之選
不行而學校之廢也久矣行如躑躅而在君子之位孝
姬曾閔而姓名不出於鄉閭如先生者起家隴畝之間

非有通經洽聞以啟發其至性而又非有呼吸吐納熊經鳥伸之術如所稱安期羨門導引辟穀之方也而竟能躬修孝德格於神明年臻大耋眉壽無艾使其生建元神雀之間當必備三老五更之選如桓榮故事矣雖然士君子患德行之不立不患名譽之不彰今

天子方將廣厲學宮凡辟離明堂封禪養老之典次第舉異日以安車蒲輪徵先生於泰山滄海之間列在講作賓王國於斯時也吾將隨諸公卿後觀祝鯁割之禮聽采芻蕘之章播於金石傳之來禩實邦家之榮瑞直今日北閭之頌祝已乎於是辛生再拜肅

賓遂書以爲先生壽

大司成胡公壽序

今天子之三年 詔再舉天下士弓旌之使冠蓋賁相望於塗而太史胡公典校北闈蓋獻諸公宮者百七十有一人其自燕趙之奇杰鄒魯之髦譽以及秦晉豫越懷瑜握瑾之彥悉羅而致之於門余嘗得與其二三弟子游卽無不鷹揚虎視卓然自爲壇坫者於是歎公之知人能得士也踰年丁亥王春月十日是爲公攬揆之辰於是蓋強仕而加四云羣弟子之待詔公車者各持其方土之物北面再拜以用幣於公之庭而徵辭於某

始焉有進者曰自小子之侍吾夫子也燁然如春溫然若家人其容敬其辭吉以愉上指遠古下觀近世放乎八垠不可紀極源本窮委疊疊忘勸初若河漢久之乃得聞所未聞少焉有進者曰夫子之於余有異矣如鐘之在虞如瑟之方希庭戶間然尊彝在列微聞警欬似移我情繼焉有進者曰夫子之於余又異矣其言曰安身取譽爲難也恭而恕可以行遠介而寬可以砥俗溫文而貞靜可以事親交友子其勿忘斯言終焉澣衣練冠有悴其容而進者曰殮吾親惟夫子是恤娶吾室惟夫子是倚饗殮罔繼惟夫子是問先生凡勿侈元禮仲

舉之稱而第爲小子輩寫罔極之私余曰甚矣子之師
惠而有禮也夫訓迪罔勑者敦學之方也寂然相示者
德機之守也安身取譽者忠恕之教也婚與葬必賜且
賻者周急之誼也昔者孔子大聖猶曰自吾有回門人
益親其一時師弟子相得益章周旋於匪兇率野之際
蓋至今猶有可想見者子輿而下微言中訖漢興乃有
董仲舒鄭元之徒表章經傳事同樸斲然皆各自專家
未能折衷於至當之域至濂洛諸儒之學出而聖道昌
矣伊川之後有考亭考亭之後有蔡九峰他如楊時游
酢李侗謝良佐輩皆漸摩緒論以踐聖賢之闕明代理

學不絕如髮賴陽明龍溪諸君子維持不衰以至於今
斯道之責非公其誰與肩之且夫古之聞道者多在遲
暮之年或有其年而其書未必卽成卽書成矣而未必
卽遇其人以傳於後今公之春秋未艾也且此百七十
有一人者豈無定夫中立若而人者乎考百世之異同
析六經之奧旨衍河洛之元文剖龜龍之秘蘊要使羲
軒以來薪盡火傳之義昭然如若木之初升而顧兔之
復朏俾昔人所稱吾道在東南者轉而爲北然後旁舉
墜緒勒成一書上自帝王卿相賢奸忠佞之行事以逮
封禪郊時禮樂刑罰天官律歷之故食貨風俗陰陽卜

筮之微靡不貫通其說副在名山傳之于祀固不朽之
盛事而文章之絕業也何必熊經鳥伸友安期訪羨門
乃稱久視哉雖然天下之理同塗齊致象教虛無總蘄
見性余聞公蓋善爲浮屠家言其譚理不減道林元亮
審如是也余將辦芒屨竹笠從公演三車而詮四諦相
與爲忘言之學可也幻相浮名又烏足以爲公壽

馮太夫人八袞壽序

新天子御極之三年方外悉朝民用大酺天下熙然稱
治而吾師大保馮公實以阿衡之望燮理乎左右如減
徭役省戶口定刑章勤選舉目明聰達百度咸釐公曰

拜手稽首敢對揚休命

上曰以四方甫亂尚未克記君於功宗若山田圭瓚之
賜及所以褒顯二人者朕且有後命迺孟冬十有一月
朔是爲太夫人八袞設悅之辰而公之介弟季君某以
干城應運升於司馬爲進士旣屆期公擁笏垂魚捧象
服而趨於左季君朱芾蔥珩執鳩玉而趨於右奏華黍
之遺音咏南山之不騫曾孫以下蘭茁其芽龍文而駒
齒者或炙笙簧或曳竹馬相與譔歌笑語舞蹈於階前
太夫人顧而頷之意寬然樂也三事之大夫暨羣卿百
執事之人束帛加璧畢進前爲壽寫爲謳吟頌禱之辭

以紀一時之盛而予小子事公久其於太夫人則諸孫也其又烏能已於言夫某之濫廁於公之門也蓋自歲己未始也當是時公年方少季君甫舞象勺太夫人坐於上羣弟子拜於下儼然畫翟而六珈不聞以艾稱也迨其後公賦閒居則一再拜於范陽里舍顧獨益疆健倍於初見時閒嘗出穀核果炙以噉客至丙夜不倦雖遠覽王畿近周家園然非如潘岳所云輕軒板輿勞雙鬟之扶掖者垂今三十年矣余小子髮且種種數以骸骨乞休向之拜堂下者皆落落不可復聚而太夫人之宣髮而渥丹自若也耳聰而視細自若也行不恃粥而

步不恃杖自若也世言養生家多呼吸吐納之術以余
所聞太夫人則無是豈惟無是中霑寢廟以享以祀鸞
刀之薦蘋蘩沼沚之供罔弗虔也五服以外冠衣妻必
赴其他亡業而賴以舉火者罔弗黽勉調給之也是故
雖有綸褱藻火之衣弗服也必以皂綈雖有鼎俎之味
膏沃之奉弗旨也必以藜羹卽公自政事堂歸輒問今
日所便章幾何卽稱旨爲一加七箸夜漏且數下刀尺
輒輒達戶外矣之數者於法皆勞且易以衰而太夫人
顧反益健抑古所謂恭則壽思勞則善心生者其有得
於天性然耶庶常某君輩公丙戌榜所取士也聞予言

操卮而進曰有以哉吾夫子之拔園葵而風示百寮也夫前史所豔稱者無如宋張齊賢賈黃中之母皆以期頤上壽蒙人主之嘉歎而惜其行事不少概見若太夫人之撫摩季君如屬毛卒勉之使就功名甲申之際侃罵賊不少挫審義命知廢興雖往古烈丈夫猶難之其爲度越二母何等也書曰天壽平格又曰率惟茲有陳保乂有殷多歷年所言國家無疆之祉繫乎大臣之端平翼亮也茲者邦家初奠如皎日之方舒然自公之起田間而論治者以爲有貞觀慶歷之風藉非太夫人康疆逢吉俾公無內顧憂卽何得夙夜蹇蹇以事一人

者是故徭役減天下無溢征矣戶口省天下無捐瘠矣
刑章定天下無冤氓矣選舉勤天下無佚士矣有如
天子一旦乘清宴之暇詔許公母子上殿賜坐與語卽
問公何以治國公必曰臣不敏賴臣母教臣故至此卽
次問太夫人卿何以教若子則必曰臣子治國一如臣
治家

上必稱善勤璽書以褒異之由是言之太夫人之壽大
下人之壽也則夫天下之欲徵賜於公而願得長有太
夫人者其爲謳吟頌禱當不後於羣卿百執事矣夫宣
布德意以乂安海內俾其親有無窮之聞與慈惠聖善

而貽子以令名者是皆可歌也乃歌曰南山有篠維鳳
其遊矣君子有母百祿其道矣又歌曰維岑有栢維雲
其守之君子有母昊天其右之歌旣闋公與季君趨而
入北面再拜以舉太夫人之觴小子敬退諸君請載彤
管而紀其事

王太夫人八袞壽序

新天子初入關也大敦典殷獻民千旄之使者賁相望
於途而今少司農梅和王公方奉其太夫人里居再拜
問所以有重違鄰下色太夫人曰吾聞之智者不後事
以圖功仁者不愛身以澤物汝其對揚休命期有以塞

四海望何沾沾蔬水之節爲公曰謹受教乃拜 詔以
行比就道則又誠之曰古人縮符百里輒思以所學布
之矧汝爲

天子股肱掌邦計擾兆民卽官與虞周豈異也且爾處
田間久親見大亂以來百姓鶉衣鳩面道殣相籍一旦
真人卽阡固將蠲繇役罷額外征以與天下更始而
以爾小子備員其間朝夕與聞大計爾其勿爲桑大夫
哉公曰謹受教於是極陳得失凡所以爲百姓請命者
靡餘力如詔減天下田租之半及太僕水衡之冗濫者
一切報罷其策悉自公發之每有所滌除輒以一寸函

歸白棣州邸舍太夫人喜爲一加七箸蓋向者公嘗治
宛又嘗撫山以東太夫人皆從故公得資壺教以數歷
中外所至皆有聲焉居無何公日夜念太夫人上書請
休沐詔暫許乘傳歸公服山元之玉有瑯蔥珩以拜
下因大集宗族賓客醕樂而還縉紳莫不榮且羨之今
年丁亥三月上巳是爲太夫人八袞開悅之辰於是縉
紳衿韋之士修羔雁執爵帛各致其謳謠誦祝之私而
余小子輩與公爲同官又辱在姻婭其又烏能已於言
編修呂君者太夫人甥也作而曰子但知太夫人母子
貴顯聲翕赫公卿間不知其餐茶茹蘗躬泚緝而兼父

師之教者六十年如一日也蓋不佞纘祖幼嘗聞太夫人於母氏往往爲道微約時事云贈中丞公之捐館舍也去結襦四歲耳太夫人自抱司農公以泣曰苟遺薪之克荷余雖顛領其何傷其析箸也田廬取其瘠牛馬取其羸僮僕取其老且穉者娣姒之間降心相御卒蒸蒸無勃谿語以故司農公得肆力問學掇高第爲世名臣而曾孫以下繩繩振振且未有艾夫勞苦繁傷憂心況瘁之事太夫人固躬際之而康疆逢吉天顧篤之於耄耄之年母亦其惇龐和厚之氣有以召之使然歟余曰有是哉吾子之善頌也夫前史所稱本支瓜瓞之盛

惟瑯琊王氏爲最故郭璞有淮水之占呂虔有佩刀之贈然祥覽而下閭以內則無聞焉今吾棣之有王氏猶之在江左矣惟贈中丞公克開厥始惟太夫人克勉厥中惟司農公克成厥終繼自今入踐樞要如韋元成父子後先輝映於簡冊太夫人乘輕軒御板輿對烏裨之嘉樹撫繞膝之蘭蓀將六珈之飾不勝服而長信之翟褕繡袷不勝賜也則請歲進一觴焉太夫人其領之否耶

胡太夫人七十二壽序

天子旣開白虎之觀旦夕就經筵一時文學侍從之臣

咸得優游偃仰各迎其所親於邸歲時尊酒相娛勞往
往形之詩譔咏歎以爲元和慶歷或庶幾焉大司成此
菴胡公固楚人也由庶常檢討三歲而至今官顯矣然
每飯必祝曰老母幸甚無恙道路而稍夷也吾將買蒲
帆一葉浮沅湘而歸問武陵之谿潘岳不云乎灌園鬻
蔬以供朝夕之膳牧羊酤酪以俟伏臘之費亦可以絕
意乎寵榮之事矣蓋是時四方悉就戎索惟湖南稍後
而太夫人未及以板輿從於時年七十而加二矣公雖
游於燕心未嘗不在簪笈之南昭邱楓浦間也三月五
日則太夫人設悅之期屆矣公南嚮再拜曰記吾之在

子舍也宗婦授几稚子操杖賤兄弟酺行二觴進前爲
壽嫺姪宗黨頌白而兒齒者或炙羔豚或貽束帛烹鮮
飲筭雜沓於吾之門而今數年朝市變矣微論頻經兵
燹未敢復望曩時之盛卽不腆之廬幸而猶在而草草
勞人未能得請以去間關問道而侍吾親之側吾其如
倚閭之思何於是又再拜惻然不懌者久之編修呂君
輦暨南宮新彥與畿輔之孝廉凡百九十有三人則皆
公丙戌春秋所薦士也聞公言環余而請曰夫子之不
懌固然然微先生言又誰爲解其鬱陶者余曰詩有之
王事靡盬不遑將母當時天子在上海內無事士之仕

者半雍梁冀豫間人非有山川阻絕戈鋌搶攘之事而猶且馳驅軼掌缺於溫清爲人上者至爲詩以勞苦之若夫邁百六之奇蒿際鼎革之異變君子亦權其大者而菽水之小孝非所以爲論也蓋公年十八而孤贈君翁有丈夫子三而度公惟有異徵故徹瑟之夕以屬太夫人曰子也才惟子之賜否則惟子之怨太夫人日夜誦此語以訓公曰天平不念胡氏耶胡氏而有後吾不以江陵千樹橘而易吾墨莊之貽也因盡出其貲以購異書復招致四方賓客使與公游故公得沉心六籍直踐濂洛紫陽之閫闕涉洞庭覽九疑東浮海西至於崆

峒足跡遍九州之半而今且以其學爲天下宗公嘗爲
余言太夫人拮据婚葬五十年茹荼啖藥之苦涕浪浪
霑襟裊間他如鄉鄰之惠以周也姑婦奴之婉而愉也
宗祔之祭必虔而組紉維織之必勤也余雖未得拜堂
下竊臆其爲溫和莊敬侃侃有丈夫風義命廢興之際
宜其知之審矣王孫賈之逢齊亂也其母勉之以克倡
大義昔者甲申之際與齊事豈異也一旦 真人仗鉞
殲我仇耻而公以文章道德歷石渠而踐師臣之席鼓
舞振興爲

聖天子廣樸棫作人之教勳名赫奕方將遠軼姚許此

固太夫人所舒贖解頤藉手以報地下者嚮使公無尺寸之豎而姓名不越於里閭雖珍餽日陳於俎綺穀日充於側吾固知其卻而不御也故曰謹身節用者士庶人之孝也立身揚名以顯父母者卿大夫之孝也矧今王威遐播遠邇咸賓白環西獻紫貝南來江漢之間佇見安瀾廓清之績彼時公必以太夫人春秋高請得暫休沐

上且勅有司具安車奉迎邸舍慰問燕勞如張齊賢賈黃中故事公然後捧六珈象帟率羣弟子進七命之服獻刻玉之鳩再拜而前曰某不類違太夫人郤下者數

年今乃得偕金閨之諸俊橋門之譽髦合辭而進一觴
然微太夫人教則何以至此吾知必大稱善七箸數加
焉以視嫺姪宗黨之羔豚束帛顧何如也於是諸弟子
曰善咸入而爲太夫人壽公亦驪然色霽相與咏旣醉
之詩而退

李元佩侍御太夫人壽序

嘗讀詩至皇華之篇曰王事靡盬不遑將母而北山之
詩亦致慨於采芑瘡牡然其旨皆自上之人代爲宣述
以爲馳驅行役之勞因歎古之仕者公爾忘家而遭遇
隆盛如此其幸也舊制侍御史出而代天子問民所疾

苦驄馬繡衣甚燁赫矣然蒼頭廬兒卽不得攜三尺以
上往故其體勢尊優而休沐溫清之儀視他曹異猶有
古皇華之遺意焉惟視學使者則不然其報代也以三
年且令甲許攜孥勿問故銜是命而往者衆以爲榮銜
是命而高堂之逮養者則相與歌咏而羨豔之然朝廷
之於茲役頗重其選蓋畿輔爲首善之樞而大江南北
山川鬱勃其士人英多而特達非淵深端毅之人卽無
以罔羅俊彥稱

聖天子廣勵學宮至意中州李元佩先生之視學江南
也鋒車未出公卿已翕然稱慶會予以抱關之役先後

奉簡書僅從馬上揖鞭而語及道出平邱父老方除道迎先生壺漿餽糒屬於路僉曰賢哉李母教其子以直聞而今且爲南國師卽南國之人聞前旌之至者執殳扶杖亦曰使君有母實賢旦夕板輿來江上吾儕盍往觀之廼先生則衡鑒無爽一試而盡鍾陵之梗柟再試而空姑溪之驥驤方將攬轡濠梁過歌風戲馬之臺而更取先正大家之文字櫛句比懸諸國門爲多士式此其起衰救弊功不在昌黎下矣余不佞與先生未嘗數數而獨以文章道義心期相許其爲契誼之殷反有異於丹雞白馬盟棗栗而交杵曰者亦何以得此於先

生哉是月廿三日是爲太夫人設悅之辰於時蓋六十而加六矣余旣以算縉之賤弗克展登堂之敬而懽欣忭蹈之私則有不能已於言者夫前史所載生徒絳帳之盛無如馬南郡融然論者猶有經師之譏而其母之行事亦不少概見狄梁公薦士如飢渴桃李盡出其門而瞻望太行不殊於詩人之歌陟屺由是言之天倫備矣而未必有其位爵秩顯矣而未必及其親如先生之於太夫人者固不可謂非人倫之僅事矣且先生固嘗視鰥鰥大治然當此之日望子舍未必不緬然心動孰若今之慈烝服拜舞庭內而且萃江南之譽髦歌壽

考作人之詩以歸本於太夫人畫荻之教吾知他年三公之鼎鉉不以易此日之岡陵矣當茲 覃恩錫慶太夫人且有六珈褕褕之命而季君玉佩行將繼元方而起先生之長君英英爲天廟之器諸孫蘭茁其芽策竹馬而炙笙簧太夫人乃頤不勝頷焉然則穎上之荀龍烏衣之宅巷未足爲先生詡也昔者敬姜以勤訓其子猷仲尼聞之而歎今太夫人春秋鶴髮矣而親蠶夜績不以富貴少衰恭則壽思勞則善心生理有必然余故不敢侈言西王戴勝之事而但述敘其懿嘉如此太夫人聞之未必不如聽田野之謳而聆桑麻菽粟之語也

先生在側其進一觴

壽袁綏南兵憲序

今天子宅中之二年江南始就戎索少傅洪公奉簡書建幕府於金陵一時文武大吏悉聽公選擇公乃再拜颺言曰臣謹按地圖自姑孰迤西屬之障實維舊京三輔地北控皖蓼南界宣歙西則彭蠡九江之上游在焉商旅貨財於是乎集芻蕘齒革於是乎徵萑苻之聚伏墉之寇於是乎錯處詰戎兵撫元元非其人有文武材則不幸往往有事臣敢臚所知者姓名治狀再拜聞闕下於是關中袁公治兵池太而建業之西資保障矣

袁公拜命未踰年而江右之守將叛聲號震鄰羽書日數十至公緩帶勞士卒若爲不聞也者民安之卒以無恐事平廷論以公爲能將以粵西之役畀公節鉞會朝廷方以久任重岳牧卽蕪人亦惟恐公之不暫留也已丑秋余以權務來鳩茲入其疆溝洫有畔秔稻棲畝頒白不負訟獄者或中道而返余心特異之竊謂公何以得此而未幾其鄉之大夫士越父老執事御事有進於庭者曰吾曩者苦賦矣匪賦之苦有羨於賦者公來一切禁止之至於今里無夜呼吏不敢攫吾金焉江以南有舟無馬馬固不可廢也胥吏喑喑據鞍橫索一駒

之費盡百姓十年之田然自公之法行而負耒耜逃者亦鮮矣宵人喜訟譸張作慝丞史舞文相表裡爲奸利毫毛茂茂陷人不活公深局重鍵耳目無所寄書成而孚吏錯愕不知所指但抱空牘惕息而已從莫敢以鉤金束矢引舊事以陳臬事者西北健兒舊將之部散處塵間憑陵馳突民用患之勢如花門回紇公尺籍是稽戒之曰士勿譁聽誓命否則戮汝汝勿悔師行食從莫敢不供取之重任之數鮮不易子而齮其骨公曰今年乾澤明年無魚吾不憚爲爾請命焉夫冒太史之威以與百姓爭旦夕之利甚難也而公顧易之此其剛毅豈

悌爲何如者吾儕小人幸得蒙樂利長子孫而公之妾
不衣帛馬無食粟蓋自父兄所覩記卽未有若我公廉
者今吾日夜惻然訓子弟不敢爲非而少年之剽悍者
亦往往賣刀劍歸南畝故以他郡之治較之吾兩郡稱
太康矣吾猶恐公之一旦被寵褒以去而他郡遂蒙其
福也余不佞旣從公卿之末知公賢矣而茲又有感於
父老之言間常一至其庭二三隸人方薙草於陞阨之
間而公之案牘肅然無畱事焉公嘗爲余言吾始治民
如薙苗櫛髮惟恐傷之二年而駸駸有異三年而無所
復用吾法今吾一切尚大體不苛細庶幾乎參苓之已

疾無大創焉又謂 國家方用武漢興間不宜大徵商
艘以病往來庀工作艦費不過度支數萬緡耳其策雖
未卽行要足見公許謨猷念籌畫至深遠異日者進顯
秩堯樞柄斟酌調燮以宏我 新造邦俾珥筆者稱洪
公爲知人而公之不負所舉爲足述焉斯不亦邦家之
光歟詩曰柔亦不茹剛亦不吐言其能惠鮮鰥寡而弗
難強禦也又曰君子萬年景命有僕言其豐功茂澤被
於當世而垂之來葉實有可萬年之理也今仲月之廿
一日適當公覽揆之辰諸父老咸扶杖承榼謳吟舞蹈
以介無疆之祝余不佞辱公縞帶之知而樂於觀其盛

也爲之歌天保之章以佐酒公其無讓焉

題詞

友貽草題詞

宋琬曰讀陸平原文不厭其多誦劉脊虛詩弗患其少古今作者代不數人人不數卷傳不傳其人莫得爲也若乃咸陽旣火曹氏倉湮天祿攸燔楊雄書在汲冢不亡靈光獨表余嘗遙集曩人緬懷舊麓或得之覆醬之餘或遇諸燒屋之下譬之良友殊鄉崇朝抗手名山千里夢境忽臻所以晉臣之存敝席魯婦之泣著簪未免有情唯茲故物耳是編幾至補袍累逢劫火桓君山之

志事杜元凱之生平可云字挾霜痕紙畱雨色無假元
晏足儷卿雲者已然予聞敬哉自江淮歸多得其家所
藏舊物於市張司空延平之劍宜若恍忽難信觀此良
足徵矣

道場山倡和題詞

余慕茗中山水舊矣今年秋杪便道赴吳門因而至焉
將抵郡城數里望見山上浮圖掩映於白雲紅葉之間
舟師指以告余曰此道場山也余聞而躍然欲約二三
同志者一造其巔兼訪太白山人之墓酌酒賦詩以弔
之居亡何有犬馬之疾藥囊爲伍者累旬日比稍稍有

瘥而楓林盡脫嚮之丹紅黛綠者裸而髡矣仲冬五日
扁舟往游是日微雪初下出郭門日已高春舍舟遵麓
未及半而暝鐘作焉寒風颯颯動人心魄歸乎舟中客
有悔其遲出者有曰惜未攜襪被信宿山間者余笑而
慰之曰杜少陵不云乎佳處領其要推之凡事莫不皆
然而況於今日之游乎諸君喜飲酒盡五石而散同游
者十有三人各賦詩一篇具如左嗚呼太初有知或亦
以不見余等爲恨哉

題張幼量所收董宗伯卷

文敏書法人多喜其姿態飄逸如簪花倩女有迴風舞

雪之致耳至其用羊毛筆作劈窠書則別爲一格真有絳雲在天卷舒自如之妙無論世俗紛紛罔知愛重卽文敏生平亦不數數涉筆譬如右軍父子篇翰最多而得意者惟在官奴鵝羣諸帖典會所臻在當日亦有不
知其所以然者幼量得此充爲鴻寶而患難以來畱之於圖書放失之餘尤可寶也

題吳遠度畫卷

今人作畫皆宗北苑大癡規摹逾肖去之逾遠譬如太倉歷下擬古詩十九首不免爲後人口實蓋借面弔喪終非本色何如直舉胸情落落然孤行一意耶櫟園先

生以遠度此圖示予未謀面也卽有以得其爲人及與
定交白下見其襟期浩渺瀟灑出塵廼知圖畫中固有
真性情焉遠度爲余言曾策蹇驢過大梁之墟訪信陵
公子侯嬴朱亥之遺跡歸而若有所得焉太白詩云黃
河落天走東海萬里寫入胸懷間若遠度者斯足以當
之矣

題梵公上人論王右軍書卷後

昌黎之評右軍似爲失言梵公駁之當矣乃其送高閒
上人則極稱張長史書以爲變動猶鬼神不可端倪亦
少褒矣豈其獨善草書而不知行楷中自有簪花垂露

之妙耶之二者不具論吾獨喜夫梵公之多藝而好辨也豈昌黎所云浮屠氏善幻而多技能者耶則卽以梵之論書爲支遁之談禪可也

題王貞簡先生傳後

東晉世家以王謝爲稱首而史臣之論謝安石也則譏其廢禮於媮薄之俗崇侈於耕戰之秋扇頽風而淪雅道非所以詒厥孫謀也至於瑯琊諸王則不然孝貞兩公著令德於前茂宏累葉嗣徽音於後雖風流競尚而典則猶存呂虔佩刀之贈郭璞淮水之占豈誣也哉吾友農山侍御瑯琊舊族也壯歲登朝聲聞殿陛之上

且拂衣東歸與右軍誓墓同也諸郎瑤環瑜珥顧眄偉
如而孝友敦睦尤得睢陵公家法予得交其父子每歎
息而敬慕之今觀楊太保公所爲貞簡先生傳而後知
其發祥濬哲非一朝夕之故也詩曰樂只君子保艾爾
後先生有焉又曰無念爾祖聿修厥德農山有焉嗚呼
作法於奢謝太傳猶且不免而先生以嘆喏諸生皎然
不欺其志使其顯於當世其教豈止閨門之間乎紬於
人而伸於天宜其子孫振振流聲譽於無窮也夫

題筠士上人詩

詩至於唐盛矣釋子之可傳者皎然清江而外曾不數

人其能卓然名家者何寥寥耶數十年來詩教與禪宗並行於是方袍之士人人自以爲握靈蛇之珠矣然而審音按節往往不合於律度甚且拈趙州黃蘗之剩義栩栩然自相標榜自余觀之乃禪宗之偈語耳何足以言詩筠士負瀟灑出塵之姿故其爲詩也絕去塵埃超然物表今其所詣已在湯休賈島之間況其年正未可量也哉筠士之師青壁以法門龍象爲詩壇耆宿宜其耳濡目染有此傳燈高座然而青出於藍吾慮後來之居上也質之青公得無拈花微笑乎

題程端伯畫

余嘗登華嶽小憩掌蘿坪下愛其樹石蒼寒惜無善畫者爲余作圖清溪此幅不必甚肖而坐臥其間歷歷如舊游也

題曹魯元所集諸名公尺牘

余讀杜少陵追和高常侍人日詩未嘗不愴然流涕也蓋古人於朋友不以生死易心如此至若任昉沒而藐諸孤饑寒瑱尾不能動到溉兄弟之一盼況乃惜其遺編剩墨乎魯元行古人之道者故於諸君子宰木旣拱之後取其赫蹏片紙而藏弄之想其展閱之餘不勝車過腹痛之悲焉若曰區區翰墨充耳目之娛非其旨矣

嗚呼此未可爲勢利場中人道也

張豫章詩集題詞

余少讀二陸之文愾然想見其爲人今來茸城過其故里未嘗不太息累歎也旣羨其兄弟之才有損吹篴應之盛而竊歎夫繼之者鮮也豈天之生才固若是其難歟及觀豫章兄弟之詩燦乎若植琅玕而聯圭璧又何易也夫佳樹玉樹固已凌顏轅謝自成一家惜乎未覩其全也豫章方在盛年著書將與身等其爲詩也海涵地負與會包舉而天姿高秀有天半峩嶠之勢焉夫人之才思往往有所逼而後出機雲而外如東晉之二謝

沛國之諸劉一門之內自爲壇坫主葵邱而爭黃池之
長勅敵固不在門外也豫章之詩固非時流所敢望而
兩弟之火攻亦復駸駸可畏雖欲勿工也其可得乎

題吳梅村先生愛山臺脩禊卷後

余以戊申秋訪吳蘭次太守於吳興蘭次觴余於愛山
之臺感風物之淒清覽雲山之稠疊萬點青螺几上散
歐餘之彩幾羣白鷺杯中瀉顧渚之濤興至憑闌醉香
醪於上箬詩成刻燭追勝賞於南皮摸索豐碑愧乏中
郎之辯披吟麗句驚題幼婦之辭吳公子之博物觀風
適魯之年王內史之風流脩禊暮春之月余也來當後

至帳令序於秉蘭景彼前賢懷高風於咏雪爰陳座右
不無見獵之心乃作銘章深以續貂爲愧主人載喜將
欲勒之貞珉廉吏難爲旋遭逢夫貝錦館庭寂寞黯風
雨於龍蛇賓客蕭條堪網羅乎鳥雀況也永歎徒抱慙
於良朋惠我好音幸過從夫快壻縹緲宛在似出新裁
風物依然已成陳迹以我輩之興悲於昔日知後來之
有感於斯文庶幾好比王郎與青氍而共寶重逢莘老
以墨妙而名亭什襲珍藏三復歎息

書卓永瞻詩後

余以乙亥與珂月先生同貢於有司踰年同試禮部燕

市酒樓狂歌縱飲歡相得也乙酉始見火傳於金陵年
纔弱冠耳曾幾何時而永瞻亦弱冠矣嗟乎三十年之
間而交其祖子孫三世余安得不頽然老也惟是卓氏
人才輩出而後來者復駸駸欲度驊騮前慈明家世代
有君宗孝綽門風人皆球璧攬其篇什蓋不能無三歎
云

爲吳蘭次題顧繡花鳥冊

刺繡獨雲間最工而皆以顧氏名吾初疑其閨闈女子
所作今在雲間乃知工人半男子十指如鉅而有鍼神
之巧且習其業者甚衆幾於燕之函而粵之罽矣然一

技之中自有精蘊高下焉此冊含姿韞秀盡態極妍正
使黃荃徐熙解衣盤礴吾未知其孰勝也蘭老具正法
眼因舉以贈之韻海樓中焚香散帙一繙閱間亦揮毫
染翰之一助云

孫永年敬刊

曾孫

字宜寧

校訂

安雅堂未刻稿卷第六終